

BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
OPĆINSKI SUD U ZENICI  
Broj: 43 0 St 217664 22 St  
Zenica, 17.12.2024. godine

Općinski sud u Zenici, stečajni sudija Amra Brkić, u stečajnom postupku nad imovinom stečajnog dužnika "VOĆEPROMET" Društvo za transport, proizvodnju, unutrašnju i vanjsku trgovinu, d.o.o. Tešanj, ulica Šije bb, Tešanj, odlučujući o prijedlogu likvidacionog upravnika Sakiba Hasanića iz Tešnja i razlučnog povjerioca Sparkasse bank dd Sarajevo, nakon ročišta za ispitivanje uvjeta za otvaranje stečajnog postupka održanog dana 16.12.2024.godine, u pristustvu punomoćnika povjerioca Sparkasse bank dd Sarajevo Lejle Alić i Dalile Kuljuh, likvidacionog upravnika Hasanić Sakiba iz Tešnja, predstavnika povjerilaca i to Amre Nuhanović kao punomoćnika UIO Banja Luka, Asafa Sarajlića kao punomoćnika KPU Zenica i Zlate Tuka punomoćnik FZ PIO KAS Zenica, dana 17.12.2024. godine, donio je sljedeće:

#### RJEŠENJE

OTVARA SE STEČAJNI POSTUPAK nad pravnim licem "VOĆEPROMET" Društvo za transport, proizvodnju, unutrašnju i vanjsku trgovinu, d.o.o. Tešanj, sa sjedištem na adresi Šije bb, Tešanj, matični registarski broj subjekta upisa 43-01-0278-08, dana 17.12.2024. godine u 12,00 sati.

Za stečajnog upravitelja, sa liste stečajnih upravitelja, se imenuje Jasmin Hadžirašidović iz Zenice, Prve zeničke brigade 152, Zenica.

Pozivaju se povjeritelji da u roku od 30 dana prijave svoja potraživanja, koja imaju prema stečajnom dužniku podnošenjem prijave Općinskom sudu Zenica na broj: 43 0 St 217664 22 St, uz uplatu sudske takse u iznosu od 1% od vrijednosti potraživanja, ali ne manje od 50,00 KM niti više od 10.000,00 KM na račun budžeta ZE-DO kantona broj: 134-010-0000001672, vrsta prihoda 722221, budžetska organizacija 1606001, općina 103.

Podnositelji prijave uz prijavu trebaju navesti svoju firmu, sjedište, boravište, pravni osnov i iznos potraživanja, kao i broj svog žiro računa.

Pozivaju se povjeritelji da stečajnog upravnika u roku od 30 dana obavijeste koja prava osiguranja potražuju na predmetima i imovini stečajnog dužnika, navođenjem predmeta nad kojim se potražuje pravo osiguranja, vrstu i razlog nastanka prava osiguranja, kao i osigurano potraživanje.

Pozivaju se dužnici stečajnog dužnika da svoje obaveze bez odlaganja izmire.

Ispitno i izveštajno ročište u ovom postupku zakazuje se za dan 20.02.2025. godine u 09:00 sati, u zgradi Općinskog suda u Zenici, te se na isto pozivaju povjerioci stečajnog dužnika koji podnesu prijavu potraživanja, kao i stečajni upravitelj.

## Obrazloženje

Dana 03.12.2020. godine zz "VOĆEPROMET" Društvo za transport, proizvodnju, unutrašnju i vanjsku trgovinu, d.o.o. Tešanj podnio je putem punomoćnika prijedlog za otvaranje likvidacionog postupka. U toku postupka likvidacije privrednog društva Voćepromet doo Tešanj, utvrđeno je da društvo nema imovine koja bi pokrila sve dugove koje društvo ima, pa je likvidacioni upravnik podnio prijedlog da se nad privrednim društvom "VOĆEPROMET" Društvo za transport, proizvodnju, unutrašnju i vanjsku trgovinu, d.o.o. Tešanj otvori stečajni postupak u skladu sa članom 103. Zakona o stečaju. Sud je zakazao ročište za ispitivanje uvjeta za otvaranje stečajnog postupka za dan 08.05.2023. godine. Na ročištu je likvidacioni upravnik izjavio da društvo ne obavlja bilo kakve aktivnosti na tržištu, nije kupovalo niti prodavalo i ne ostvaruje nikakve prihode od djelatnosti. od 2009 godine. Sva pokretna i nepokretna imovina društva je prodana kroz izvršne postupke, te je napomenuo da donesena rješenja o dosudi nekretnina u vlasništvu društva nisu još uvijek pravosnažna i izvršna. Svi transakcijski i devizni računi VOĆEPROMET doo Tešanj su blokirani od 2009 godine. zbog navedenog likvidacioni upravnik je naveo da je dostavljena sva dokumentacija koja potkrijepljuje navode i koja je propisana članom 58. stav 4, Zakona o stečaju, predlaže sudu da u skladu sa odredbama navedenog Zakona donese odluku o prijedlogu za otvaranje stečajnog postupka bez pokretanja predhodnog postupka jer stečajni dužnik ima prijavljenih potraživanja u iznosu od 5.510.399,79 KM, a nema imovine pokretne i nepokretne pa ni za pokrivanje troškova stečajnog postupka. Stoga predlaže sudu da shodno odredbama člana 102. stav 7. Zakona o stečaju pozove povjerioce i zainteresovane osobe da u roku od 30 dana od dana objavljivanja poziva uplate predujam za obezbjeđenje troškova stečajnog postupka u iznosu koji odredi stečajni sudija.

Punomoćnik razlučnog povjerioca Sparkasse banka d.d. Sarajevo je na ročištu održanom 08.05.2023. godine, zatražio kraći rok za izjašnjenje na prijedlog likvidacionog upravnika, posebno iz razloga što se kod Općinskog suda u Sarajevu vodi izvršni postupka po prijedlogu tražitelja izvršenja Sparkasse banka d.d. Sarajevo protiv izvršenika Voćepromet doo Tešanj, te kako žalba na rješenje o dosudi nekretnina u vlasništvu izvršenika još nije riješena, sud je ostavio im kraći rok na izjašnjenje uz obavezu da obavijeste sud ukoliko Kantonalni sud u Sarajevu riješi po žalbi.

Podneskom od 31.05.2023. godine povjerilac Sparkasse banka dd Sarajevo je obavijestila sud da je kantonalni sud u Sarajevu donio rješenje po žalbi i ukinuo rješenje o dosudi te predmet vratio prvostepenom sudu na ponovni postupak. Dana 20.11.2024. godine povjerilac Sparkasse banka d.d. Sarajevo je dostavila izjašnjenje u kojem je navela da su potraživanja prema društvu "VOĆEPROMET" Društvo za transport, proizvodnju, unutrašnju i vanjsku trgovinu, d.o.o. Tešanj te da izvršni postupak kod Općinskog suda u Sarajevu traje preko 13 godine, te da stečajni sud ima osnova da otvori stečajni postupak jer otvaranjem stečajnog postupka nastupaju određene pravne posljedice a što će u konačnici dovesti do bržeg namirenja povjerioca.

Sud je dana 16.12.2024. godine održao nastavak ročišta za ispitivanje uvjeta za otvaranje stečajnog postupka, na kojem ročištu je likvidacioni upravnik ostao kod Izvještaja od 03.06.2024. godine osim u dijelu gdje je naveo da privredno društvo "VOĆEPROMET" Društvo za transport, proizvodnju, unutrašnju i vanjsku trgovinu, d.o.o. TEŠANJ, ulica Šije bb, Tešanj, nema nepokretne imovine jer nekretnine na kojima je upisano pravo vlasništva u korist privrednog društva nisu prodane u izvršnom postupku koji se vodi kod Općinskog suda u Sarajevu.

*Razlučni povjerilac Sparkasse bank d.d. BiH na ročištu je izjavio da ostaje kod prijedloga za otvaranje stečajnog postupka, te da će svoje potraživanje namirivati isključivo kroz stečajni postupak.*

*Cijeneći sve naprijed navedeno sud je našao da su ispunjeni uslovi iz člana 103. Zakona o stečaju za direktno otvaranje stečajnog postupka nad društvom "VOĆEPROMET" Društvo za transport, proizvodnju, unutrašnju i vanjsku trgovinu, d.o.o. Tešanj, pa je ovim rješenjem odredio dan i čas otvaranja postupka, imenovao stečajnog upravnika koji ispunjava uvjete iz odredbe člana 71. stav 2., člana 73, a u vezi sa odredbom čl. 76. Zakona o stečajnom postupku, te pozvao povjerioce stečajnog dužnika da prijave potraživanja i povjerioce sa pravom osiguranja da obavijeste stečajnog upravnika o svom pravu, te dužnike stečajnog dužnika da bez odlaganja izmire svoja potraživanja, te je odredio i dan i čas za koji je zakazano ispitno i izveštajno ročište, sve u skladu sa odredbama Zakona o stečaju.*

*Pouka o pravnom lijeku:*

*Protiv ovog rješenja stečajni dužnik može uložiti žalbu Kantonalnom sudu u Zenici, u roku od 8 dana od dana prijema rješenja, a putem ovog suda.*

*Stečajni sudija  
Amra Brkić, s.r.*